

Den Ambiente



GIO Y SU ALUMNONAN A BAUTIZA NAN CASSETTE DI TUMBA DI CARNAVAL



**** Dialuna anochi na residencia di Giovanni Arends, a tuma lugar bautismo di un cassette di Tumba di Gio y su Alumnonan.**

Ta trata di un tremendo cassette di Tumba, canta pa nos talentoso futuro artistanan. Riba e Cassette aki ta aparece 7 Tumba cayente den e ambiente carnavalesco. Tambe un Soca Cadans canta pa Queen Analia. E siete tumbanan aki ta cancionnan cu a resona exitosamente durante e festival di Tumba Infantil y Juvenil.

Riba lado A nos ta haya "Biba Carnaval" canta pa Lisandra Lampe, "Ban Sroié" pa Izaira Croes, "Den Ambiente" pa Joselito Giron, "E Wega" pa Quincy Hasham.

Riba lado B; "E Peluche" pa Vanessa Croes, "Bel di Carnaval" pa Chislaine Oduer, "Carnaval ata mi aki" pa Joselito Giron, y "Chubato Cumplido" pa Gio y su Alumnonan.

Durante e impresionante bautismo aki DEN AMBIENTE tabata tin e honor pa fungi como Padrino, mientras como Madrina a fungi Mavis Lopez-Arends. Pa DEN AMBIENTE e Honor aki tabata un sorpresa sumamente agradable y inolvidable.

Prome cu e acto di bautismo a tuma lugar, DEN AMBIENTE a ser sorprende pa Gio y su Alumnonan pa un bunita plaquette, como aprecio na e columna campeon aki. Esaki sin duda ta yena nos cu un satisfaccion grandi, di por ser aprecia pa nos futuronan kendenan tur Diasabra ta lesa DEN AMBIENTE.

Si nos mira cu for di e seno aki tin jovennan cu a sobresali como finalistanan, y tambe ganadonan di tanto Tumberito Juvenil, mientras e ganadora di Calypso Queen tambe ta pertenece na e talentoso grupo aki.

Esaki ta refleha caba e bon trabaoan, pero tambe e disciplina y productividad den e seno aki. Segun nos por a compronde cu e aña aki e directiva tin hopi plannan serio cu nan lo desea di realiza, entre nan dos viaje pa exterior.

Nan prome actividad e aña aki tabata un rifa cu e resultado positivo, y tur local cu nan a ricibi como ganashi a ser inverti den nan prome proyecto, cual ta e produccion y grabacion di e cassette aki, caminda tur nos jovennan cantante ta aparece cu nan Tumbanan, na nan estilo unico manera semper ta nan costumber.

Gio y su Alumnonan ta gradici tur e patrosinadonan, muy especial Juan Werleman, comerciante na San Nicolas kende ta nan patrosinador mayor den e proyecto aki.

Tambe nan musiconan kendenan ta forma e banda musical; Roy Oliver (Bajista), Lando Felida (Drummer), Chaira Giron (Cuarta), Audrey Coronel (Cuarta) y e genio joven musicó Hubert Thiel kende ta nan director musical.

DEN AMBIENTE ta felicita e tremendo grupo aki, y ta deseanan hopi exito pa futuro. Corda bon e jovennan aki ta dispuesto pa cultiva nos cultura, awor ta keda na nos culto pueblo pa coopera cu nan, cumprando e fantastico cassette aki !!

PABIEN NA NOS REINA DI CARNAVAL 1994 MAYRENE HELMEYER



**** DEN AMBIENTE ta felicita nos flamante Reina di Carnaval 1994, Mayrene Helmeyer representante di Colegio Arubano, pa su fantastico presentacion, pa cual tambe merecidamente e la sabi di ser corona como nos maxima belleza di Carnaval.**

Tambe sin duda pa su show impresionante, pa cual e hunto cu su bailarinanan, a sa di monta un super show espectacular den Aruba Entertainment Center. Mayrene su show a hinca tur hende den trans, y tabata como si fuera ta un pelicula bo tabata presencia e momento ey. Pa e motibo aki tambe e la ser escohi pa tur e miembran di Prensa como "The Best Show".

Tabata aña pasa cu DEN AMBIENTE a bay saca potret na su cas, en conexion cu cumpleaños di su Tata, caminda DEN AMBIENTE a descubri e belleza aki. DEN AMBIENTE a observa e precioso belleza aki, y a mira den su persona un candidata fuerte pa ser nos maxima embahadora, den cualkier certamen. Esaki DEN AMBIENTE a bise tambe, y e la responde cu nunca e lo participa den un concurso di belleza.

Ata! awe e ta nos Reina di Carnaval, y DEN AMBIENTE su choice a triunfa. Grandemente tabata tambe e apoyo di tur e Colegianen den Entertainment Center. Super mes!